

**Zeitschrift:** Baselbieter Heimatblätter  
**Herausgeber:** Gesellschaft für Regionale Kulturgeschichte Baselland  
**Band:** 56 (1991)  
**Heft:** 4

**Artikel:** Dr Wegglibueb und sy ungfreuti Wienecht  
**Autor:** Krattiger, Franz  
**DOI:** <https://doi.org/10.5169/seals-859690>

#### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

#### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

#### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 07.08.2025

**ETH-Bibliothek Zürich, E-Periodica, <https://www.e-periodica.ch>**

# Dr Wegglibueb und sy ungfreuti Wienecht

Von *Franz Krattiger*

Es isch emol e Ma gsi, jung, no grüüsslig verliebt und ebe dä Ma het emol vor ville Johr e Beckerstochter ghüürote. Und dä Ma sitzt jetz do und verzellt ech, wies zu dere ungfreute Wienecht cho isch. Wil i vom Gutzele und vom Pralinée mache so vill verstande ha, wiene Chue vom Chlädere, hani emol dr Schwoger gfrog, woner grad eso schöni Pralinée uf s Papyr dressiert het, wie lang as er die denn in Ofe düej. An sym Glächter a hani grad gmerkt, as i öppis Dumms gfrog ha und wo my Schwigervatter vo däm Lapsus au no ghört het, het är dänkt, jä nei, so eine cha me in dr Bachstube nit bruche. Und eben eso bini halt nummen e Wegglibueb, oder besser gsait, e Wegglima worde. E paar Tag vorem Heiligenobe, churz nach em Chrieg, amene Samsch-tignomidag, d Landschaft tief verschneit, d Stross veryst, an s Autofahre het me gar nit chönne dänke. Und wil i ebe dr Schwigersuhn vomene Beck gsi bi, hani z Fuess mit ere Hutte voll Waar, Nussgipfel, Weggli, Chüche und Greemschnitte dr beschwerlig Wäg uf Arbeitschwil zu dr Chundschaft müese under d Füess neh. I ha myner Frau, wo sälbmol no im Laden uusghulse het, es saftigs Schmützli gee und mi ufe e Wäg gmacht. Dr Lampebärgerwäg uuf, am Prinzechof verby uf d Obets-matthöchi, dä lang ahänglig Stich het mi doch zimml z Schnuufe brocht. Bim Bänkli underem Nussbaum hani e churze Halt gmacht, i bi gottefroh gsi, woni die schweri Hutte für e chlyne Moment vom Buggel gha ha und as mr jo keis Ungschick passiert, hani se süüferlig uf s Bänkli gstellt. Dasch schön-

schte Plätzli im Baselbiet het my Schwigervatter amme mit vollem Stolz gsait und i glaub, echly Rächt het er scho gha. E herrlii Landschaft, wenni umme lueg, obsi, s Tal duruuf, mächtig dr Rehag mit dr Breiteflue, Waldeburg mit syner markante Chilche, d Schloss-ruine, wyter hinde d Humbelweid, dr Bilschte und rächts drvo die hinderi Egg, dr höchschi Punkt im Baselbiet. Und wenni nidsi lueg, am Horizont dr Schwarzwald, gseh s Tal, wo dr Ry sys Bett het und mayestatisch luegt mr Sissecherflue entgege. Leider hami vo däm schöne Plätzli müese verabschide und mi ufe Wäg gmacht, Arbeitschwyl zue. Scho vo wytem hani die erschte Hüüser vo mym Zyl gseh. Nones rächt müesams Wägstück isch vor mr gläge.

Froh bini gsi, woni ändlig bis Hännis im Flüeli e Teil vu myner Lascht ha chönne ablade. Im Dorf obe, bis Rue-dis im Lade und bim Schang in dr Wirtschaft hei si mr denn dr Räschte no abgnoh. Wenn bim Schang, dasch si Dorfname gsi, in d Wirtschaft cho bisch, het di vo dr Wand här e mächtige Wildsouchopf begrüsst, dr Schang het natürlig syne Gäscht allewyl wider sy Jägerlatein vo dere Wildsoujagd verzellt. Är isch es Original gsi, wyt umme bekannt, e Flue vomene Ma, mit eme mächtige Preusseschnauz. So isch au öppen emol as Gascht dr Regierigsrot Börli verby cho und het gschwärm, wie s Baselbiet au schön syg. Jo jo, Herr Regierigsrot, meint dr Schang, s Baselbiet weer schön, numme sett bis

*Fortsetzung Seite 141*

## *Fortsetzung von Seite 104*

oben an Lieschtel e See sy. My Süessmoscht, wo mr d Wirti guetmüetig ygschänkt het, hani uusdrunke und mi ufe Heiwäg gmacht. Sisch scho ordelig dimberig gsi woni uf d Schliifhöchi cho bi. Verdutzt bini uf einisch blybe stoh, wil plötzlig e Gstalt uuftaucht isch. Dr Güggel sell mi picke, wenni dä nit kenn. Was guggers suechsch denn du no um die Zyt do obe, frog en, woner vor mr gstanden isch. Är packt mi an dr Achsle und sait in sym barsche, ruuche Ton: «Hesch schones Wienechtsbäumli?» Jo, e nei-nei, hani vüregstaggelet. I ha grossi Auge gmacht, woner us syner wyte, graue Chutte es Fuchsschwanzsägli vüre nimmt, süüberlig immene Lumpe ypackt und drmit energisch in Wald abe zeigt. «Lueg, do unde hets wunderschöni Bäumli, i bi se vor e paar Tage go aluege. Nimm doch au eis,» het er mr in s Ohr gflüscheret, «chunnsch nie billiger drzue!» Druufabe sy mr wie Indianer em Waldrand nochegschliche und denn weidli im Wald verschwunde. Sys Bäumli het dä guet Ma gly gfunde, prächtig, wie verzuckert ischs voris gstande, keis Äschli het gfehlt. Chräftig het dä Ma sys Bäumli gschüttlet, blutt und ohni Winterschmuck ischs jetz do gstande. Er het sys hauige Sägli agsetzt und mit wenige Züg isch s Bäumli im Schnee gläge, s het mr fascht echli leid do. «Do nimm» und längt mr s Sägli, i ha nit lang müesse sueche und underem gmeimrötlige Säge vo mym Begleiter hani au mys Bäumli poschtet. I bi riisig stolz gsi, woni mys schöne Bäumli in d Hütte gestellt ha und mitem Tuech, woni vorhär über de Weggli gha ha, hanis andächtig zudeckt. In dr Zwüschezyt ischs scho rächt dunkel worde und mit eme no guete Gwüsse hei mr is ufe Hei-

wäg gmacht. Und wil dr Ander au nit grad uf s Muul gheit isch, hai mers no cheibe luschtig gha. Wie nöcher aber as mr Hölschte zue cho sy, wie gschmucher ischs mr worde. S Gwüsse het mi afo ploge, bisch doch e schlächte Cheib, hani zuemer sälbergseit. «I wünsch dr none schöni Wienecht», sait dr Ander, woner mr d Hand git und jede isch sy Wäg gange. Die letschte paar Meter zu dr Beckerei hani glücklig überstande. Ha s Bäumli hinterem Lähhag guet versteckt und s Gäld, vo dr Waar woni vertrait ha, mit dr Ladetochter abrächnet, d Hütte im Magazin versorget und bi schleunigscht mit em Bäumli underem Arm verschwunde, s Hermiwägli hindere – heizue. «Wo hesch denn das här?», frogt mi d Frau ganz verstuunt, woni mitem Bäumli in dr Stube gstande bi. «Gstohle», ischs mr uuseplatzt, «Was gstohle?», «jo ebe, as ehrlige Ma bini furt, und as Dieb chummi hei.» Denn hanere die kurligi Begegnig mit däm guete Ma verzellt und do drmit weer dä Fall erledigt, hani gmeint. S isch Heiligenobe worde und wies eso Bruuch isch, hei my Frau und i s Bäumli mit Chugele, Schoggi, glänzige Bändel und Cherzli gschmückt. Aber mit jedem Cherzli woni ufgsteckt ha, isch mr dr wienächtlichi Glanz all wie mer vergange, s isch e vertüfleti, ungfreuti Wienecht gsi.